

# ***KOMMUNINUT QINERSINEQ 2005***

## **ILITSERSUUT**

Kommunalbestyrelsinut  
Ilagiit Sinnisaannut

Marlunngorneq 5. april 2005

---

Nunaqarfiit Aqutsisinut

Marlunngorneq 26. april 2005

## IMAI:

1. Aallarniut	5
2. Qinersisinnaatitaasut	6
2.1. Kommunalbestyrelsinit qinersineq	6
2.2. Nunaqarfimmi aqutsisunut qinersineq	6
2.3. Ilagiit sinniisaannut qinersineq	7
3. Qinigaasinnaatitaanissamut piumasaqaatit	8
4. Qinersinermut piareersaanerit	9
4.1. Qinersinermut Ataatsimiititaliaq	9
4.2. Qinersinermik siulersuisut	9
4.3. Taaguinermik siulersuisut	9
4.4. Qinersinissap nalunaarutigineqarnera	10
4.5. Qinersinermik allattaaviit	10
4.6. Qinersinermi atortussat il.il atortussallu agguanneqarnerat	11
4.7. Qinersiviit	11
5. Qinersisussat allassimaffii	12
5.1. Kommunalbestyrelsimut ilagiillu sinniisaannut qinersinissami qinersisussat allassimaffii	12
5.2. Nunaqarfimmi aqutsisunut qinersinissami qinersisussat allassimaffii	13
5.3. Qinersisussat allattorsimaffii pillugit naammagittaalliuutit	13
6. Qinigassanngortitsineq taakkuninngalu nalunaarutiginnineq	15
6.1. Qinigassanngortissinnaatitaaneq	15
6.2. Qinigassanngortitanik nalunaaruteqarneq, partii sinnerlugu qinigassanngortitsineq	15
6.3. Kisimiillutik qinigassanngortittut	16
6.4. Kattusseqatigiit	16
6.5. Qinigassanngortitsisut	17
6.6. Ilagiit sinniisaannut qinersinissami qinigassanngortitsinissaq pillugu immikkut ataatsimiinneq	27
7. Qinigassanngortitanik nalunaarutit pillugit immikkut aalajangersakkat	18
7.1. Tunuartitsineq	18
7.2. Qinigassanngortitat ikippallaarnerat	18
7.3. Qinigassanngortitanik nalunaarutit akuersissutigineqarnerat	18
7.4. Kukkunernik iluarsinissamut piffissaliineq	18
7.5. Tamanut nalunaaruteqarneq	18
7.6. Taasinertaqanngitsumik qinersineq	18
8. Taaguineq	20
8.1. Pappiarat taasiviit	20
8.2. Taaguinerup sivilissusia	20

8.3. Ini qinersivik	20
8.4. Ineraq taasivik	21
8.5. Taasinernut nakkartitsiviit	21
8.6. Inimi qinersivimmi allagarsiutat	21
8.7. Nammineerluni qinersivimmukarneq	22
8.8. Taasinissamut ikiuineq	23
9. Taasissutissanik allakkatigut nassitsinikkut taasineq	24
9.1. Taasineq	24
9.2. Isertuussineq	25
9.3. Kinaassutsimut uppersaatiit	25
9.4. Allakkatigut taasinnissami atortussat	25
Kalaallit Nunaanni allakkatigut taasinnermi:	25
Kalaallit Nunaata avataani allakkatigut taasinnermi:	25
9.5. Periaaseq	25
9.6. Allakkatigut taasinnermik tigooraasup uppersaanaera	26
9.7. Allakkatigut taasinnermik tigooraasup nassiusinera	26
9.8. Allakkatigut taasinnerup tiguneqarnera	27
9.9. Atortuusitsinninnissamut immikkut maleruagassat	27
10. Qinersinnermi taasinnermik kisitsineq	29
10.1. Taasanik kisitsineq pillugu ataatsimut aalajangersakkat	29
10.2. Kommunalbestyrelsimut nunaqarfimmilu aqutsisunut qinersinnerit kisinneqarnerat	29
10.2.1. Atorsinnaanngitsitsinnermut pissutissat	30
10.3. Ilagiit sinniisaannut qinersinnerup kisinneqarnera	30
10.3.1. Atorsinnaanngitsitsinnermut pissutissat	30
11. Taasinnerup innerera	32
11.1. Kommunalbestyrelsinut nunaqarfimmilu aqutsisunut qinersinnermi qinersinnerit innererisa kisinneqarnerat	32
Assersuut:	34
11.1.1. Taasinnerit amerlaqatigiippata	35
11.1.2. Sinniisussanik nalunaarsuiffik	35
11.2. Ilagiit sinniisaannut qinersinnermi qinersinnerup innererata kisinneqarnera	36
11.3. Qinersinnermut atortut il.il. nassiuunneqarnerat	36
11.4. Naammagittaalliuuteqarneq	37
12. Nutaamik qinersineq inaarutaasumillu nutaamik inissitsiterneq	38
12.1. Nutaamik qinersineq	38
12.2. Qinersinnerup inaarutaasumik aalajangiivigineqarnera	38
12.3. Qinigaassinnaassuseq pillugu Ataatsimiititamat nalunaaruteqarneq	38
13. Naggasiullugit ataatsimut aalajangersakkat	39
13.1. Saneqqutsinnissamut tunngavissaatitaasut	39
13.2. Qinersinnerni aningaasartuutit	39

13.3. Qinersinerup isertuussaanera	39
13.4. Pineqaatissiinerit	39

Ilanngussaq: Kommunalbestyrelsinut, nunaqarfinni aqutsisunut ilagiillu sinniisaannut qinersisarnerit pillugit Namminersornerulutik Oqartussat nalunaarutaat nr. 1, 24. januar 2005-imeersoq

## **1. Aallarniut**

Qinersinerit immikkoortut marluk ingerlanneqassapput, kommunalbestyrelsinut ilagiillu sinniisaannut qinersinerit ataatsikkut ingerlanneqassapput, nunaqarfiillu aqutsisuinut qinersineq ullormi allami ingerlanneqassaaq.

Kommunalbestyrelsinut, nunaqarfimmi aqutsisunut ilagiillu sinniisaannut qinersisarneq pillugu Inatsisartut inatsisaanni nr. 10, 31. oktober 1996-imeersumi § 6, imm. 2 malillugu qinersinissanut Qinersinermut Ataatsimiititaliap ulloq qinersivissatut aalajangerpai:

### **Kommunalbestyrelsinut Ilagiillu Sinniisaannut qinersineq pissaaq**

**marlunngorneq 5. april 2005**

Kommunalbestyrelsimut qinersinissami aamma ilagiit sinniisaannut qinersinissami qinigassanngortitanik nalunaaruteqarnissamut piffissaliunneqarpoq *marlunngorneq 15. marts 2005 nal. 12.00.*

### **Nunaqarfinnut Aqutsisunut qinersinissaq pissaaq**

**marlunngorneq 26. april 2005**

Nunaqarfimmi aqutsisunut qinersinissami qinigassanngortitanik nalunaaruteqarnissamut piffissaliunneqarpoq *arfininngorneq 16. april 2005 nal. 12.00.*

Kommunini ataasiakkaani qinersinermik siulersuisut tamanna pillugu nalunaarut piaarnerpaamik tamanut saqqummiutissavaat. Tamanna pillugu takuuk immikkoortoq *4.4. Qinersinerup nalunaarutigineqarnera.*

## 2. Qinersinnaatitaasut

### 2.1. Kommunalbestyrelsinut qinersinermi

Qinersinissani qinereqataasinnaatitaassagaanni qinersisartut allassimaffianni ilanngunneqarsimasariaqarpoq. Qinersisartut allassimaffianni ilanngunneqassagaanni piumasqaataapput:

- 1) kingusinnerpaamik ullormi qinersivissami 18-inik ukioqalereersimanissaq nammineersinnaajunnaarsitaasimannginnissarlu
- 2) kommunimi pineqartumi qinersinissaq kingusinnerpaamik sap. akunnerinik 6 sioqqullugu, imaappoq marlunngorneq 22. februar 2005, aalajangersimasumik najugaqartuunissaq
- 3) aamma
  - a) qallunaatut innuttaassuseqarneq aammalu qinersinissaq sioqqullugu sivikinnerpaamik qaammatini arfinilinni Kalaallit Nunaanni aalajangersimasumik najugaqarsimasuunissaq (kingusinnerpaamik marlunngornermi 5. oktober 2005 nuussimanissaq),

#### imaluunniit

- b) qinersinissaq sioqqullugu sivikinnerpaamik ukiuni pingasuni naalagaaffimmi aamma sivikinnerpaamik qaammatini arfinilinni Kalaallit Nunaanni aalajangersimasumik najugaqarsimasuunissaq.

Kiisalu kommunalbestyrelsimi ilaasortaq kinaluunniit kommunalbestyrelsimi ilaasortatut suliasamat atatillugu nuna tamakkerlugu soqutigisaqatigiit kattuffianni kommunimi allami angerlarsimaffeqartumi piffissaq tamaat siulittaasutut toqqarneqartoq kommunimi qimatamini qinersisartut allassimaffianni ilanngunneqassaaq. Aalajangersagaq pingaaruteqarpoq KANUKOKA-mi siulittaasunut, aammali pisuni allani atorneqarsinnaassalluni.

Ulloq qinersivissaq sioqqullugu sap. akunnerisa arfinillit iluanni kommunip **iluani** allamut nuunnerup nassatarissanngilaa qinersisinnaatitaanerup annaaneqarnera.

Matumani "kommuni" atorneqarmat taanna paasineqassaaq kommuni tassaasoq Kalaallit Nunaata nunap immikkoortuinut kommuninullu aggorneqarnera pillugu inatsisartut inatsisaanni nr. 11, 30. oktober 1998-meersumi, kingusinneruskullu Kalaallit Nunaata nunap immikkoortuinut kommuneqarfinnullu aggorneqarnera pillugu Inatsisartut inatsisaata allanngortinneqarneranik Inatsisartut inatsisaat nr. 2, 15. april 2003-meersumi allannguuteqartinneqartumi taaneqartoq.

### 2.2. Nunaqarfimmi aqutsisunut qinersineq

Kommunalbestyrelsimut qinersisinnaatitaanissamut piumasqaatit naammassineqarsimassapput aammalu qinersinissaq sioqqullugu sivikinnerpaamik ulluni 14-ini nunaqarfimmi aalajangersimasumik najugaqarsimasuusariaqarluni, t.i. marlunngornermi 12. april 2005.

### **2.3. Ilagiit sinniisaannut qinersineq**

Kommunalbestyrelsimut qinersisinnaatitaanissamut piumasaqaatit naammassineqarsimassapput aammalu Ilagiinnut (den danske folkekirke-mut) ilaasortaasariaqarluni.

### **3. Qinigaasinnaatitaanissamut piumasaqaatit (valgbarhedsbetingelser)**

Kinaluunniit kommunalbestyrelsimut, nunaqarfimmi aqutsisunut ilagiillu sinniisaannut qinirseqataanissamut piumasaqaatinik naammassinnissimasoq aamma taakku arlaannut qinigaasinnaatitaavoq

- ukiut kingulliit tallimat ingerlaneranni inaarutaasumik eqqartuussinikkut akiliisitsissutissamilluunniit akuersinikkut pinerluttulerinermermi inatsisit tunngavigalugit pineqaatissinneqarsimanngikkuni imaluunniit ukiut kingulliit pingasut ingerlaneranni pissutsimut nalinginnaasumik isigineqarnermi qinikkatut ilaasortaanissamut naleqqukkunnaarsitsisumik pinerluttulerinermermi inatsisit tunngavigalugit pineqaatissinneqarsimanngikkuni.
- Piffissaliussat taaneqartut ullormit qinersivimmiit atuutissapput.

Taamaattoq kinaluunniit qinigassanngortissinnaavoq pinerluuteqarsimanermigut pineqaatissinneqasimanini pissutigalugu qinigaasinnaannginnera pillugu akerliliisoqaraluarpuunniit.

Qinigaasinnaassuseq pillugu ataatsimiititap aalajangissavaa kommunalbestyrelsimi, nunaqarfimmi aqutsisuni ilagiillu sinniisaanni ilaasortaq qinigaasinnaanerminik annaasaqarsimanersoq.

## **4. Qinersinermut piareersaanerit**

### **4.1. Qinersinermut Ataatsimiititaliaq**

Qinersineq Qinersinermut Ataatsimiititaliamit siulersorneqassaaq, taassuma allattuiffigissavaa qinersinermik allattaavik, tassani allanneqassallutik suut qinersinermut pingaaruteqarnerusut, taakkununga ilanngullugit qinigassanngortitat partiillu pillugit paasissutissat aammalu qinersinerup naatsorsorneqarnera.

Qinersinermut Ataatsimiititaliaq pilersinneqarpoq Kalaallit Nunaata Inatsisartuinut qinersisarneq pillugu inatsisartut inatsisaat nr. 9, 31. oktober 1996-imeersoq naapertorlugu. Qinersinermut Ataatsimiititaliap suliasai suliarineqassapput inatsisip § 54-iani maleruaqqusat malillugit.

Qinersinermut Ataatsimiititaliami ilaasortaapput Namminersornerullutik Oqartussani Pisortaaneq, peqatigitillugu ataatsimiititaliami siulittaasusoq, Kalaallit Nunaanni Kommunit Kattuffianni pisortaq aamma Kalaallit Nunaata Biskoppeqarfiani biskoppi.

Naalakkersuisut Allattoqarfiat Qinersinermut Ataatsimiititaliamut allattoqarfiuvoq, Qinersinermut Ataatsimiititaliamut saaffiginnissutit (telefaxikkut, oqarasuaatikkut qarasaasiatigullunniit) tamarmik qaatiguuliorneqassapput:

**Qinersinermut Ataatsimiititaliaq**  
**Namminersornerullutik Oqartussat**  
**Postbox 1015**  
**3900 Nuuk**  
**Tlf. 34 50 00**  
**Fax 32 50 02**  
**Email: valg@gh.gl**

### **4.2. Qinersinermik siulersuisut**

Qinersineq kommunini ataasiakkaani qinersinermik siulersuisunit piareersarneqarlunilu siulersorneqassaaq.

Qinersinermik siulersuisuni ilaasortaassapput borgmesteri aammalu kommunalbestyrelsimi ilaasortat ikinnerpaamik marluk kommunalbestyrelsimit qinerneqarsimasut. Borgmesteri qinersinermik siulersuisuni siulittaasuvoq. Qinersinermik siulersuisunut ilaasortaq tunuarpat kommunalbestyrelsi ilaasortami akornannit tunuartup taartissaanik toqqaassaaq. Borgmesteri qinersinermik siulersuisunit tunuarpat taakku ilaasortamik akornannit siulittaasussaminnik nutaamik toqqaassapput.

Qinersinermik siulersuisut kommunaldirektørimit ikiorneqassapput.

### **4.3. Taaguinermik siulersuisut**

Qinersinermik siulersuisut qinersivimmi taasiartorfissanut ataasiakkaanut inunnik qinersisinnaa-titaasunik taasiartorfissani pineqartuni taaguinermik siulersuisussanik toqqaassapput aammalu

immaqa qinersisartunik qinersinerup ingerlanneqarnerani ikiuuttussanik aalajangersimasumik amerlassuseqartitaminnik toqqaassallutik.

Taaguinermik siulersuisusaaq qinigassanngortippat qinersinermik siulersuisut taaguinermik siulersuisussamik nutaamik toqqaassapput.

Taaguinermik siulersuisut suut tamarmik taasinissamut aqqissuunneqareersimanissaat isumagisassavaat, pingaartumillu qinersisussat allassimaffiata pappiarallu taasiviit piareersimanissaat isumagisassallugu, aammalu inini qinersivinni tamani ineeqqamik taasivissamik aammalu qinersinernut tamanut karsimik taasivimmik nakkartitsivissamik peqarnissaa.

*Inuit qinersinermik siulersuisuni ilaasortassatut, taaguinermik siulersuisussatut aammalu qinersisartut qinersinerup ingerlanneqarnerani ikiuuttussatut toqqarneqartut taamatut suliaassinneqarnerminnut akuersinissaminnut pisussaapput. Qinersinermik siulersuisuni ilaasortaq, taaguinermik siulersuisooq imaluunniit qinersisartooq qinersinerup ingerlanneqarnerani ikiuuttussatut toqqarneqartoq imminut suliaakkiutaasunik sumiginnaappat pineqartoq pineqaatissinneqarsinnaavoq pinerluttulerinermik inatsit malillugu, tak. kommunalbestyrelsinut, nunaqarfimmi aqutsisunut ilagiillu sinniisaannut qinersisarnerit pillugit inatsisartut inatsisaata § 77-ia.*

#### **4.4. Qinersinissap nalunaarutigineqarnera**

Qinersinermik siulersuisut Qinersinermut Ataatsimiititaliamiit nalunaarfigi-neqarsimanertik naapertorlugu piffissaaq taasiffissaaq piaarnerpaamik nalunaa-rutigissavaat. Tamatumunnga peqatigitillugu nalunaarutigineqassapput taasiartorfissat ataasiakkaat inuillu taasiartorfissani ataasiakkaani taaguinermik siulersuisussatut toqqarneqarsimasut aqqi kiisalu kommunalbestyrelsimut ilaasortatut qinerneqartussat amerlassusiat aammalu piffissaaq qinigassanngortitanik nalunaarutinik tunniussivigineqareersimasusaaq.

Qinersinermik siulersuisut nalunaarutaat piaartumik taaguinermik siulersuisunut nassiussuunneqassaaq, taassumalu tiguniariarlugu isumagissallugu taasiartorfissat aammalu piffissaaq sumilu qinigassanngortitanik nalunaarutinik tunniussivigineqareersimasusaaq.

Tamanut nalunaarutiginninneq allagarsiinikkut qinersinermilu siulersuisut erseqqinnerusumik aalajangiinerat malillugu pissaaq.

#### **4.5. Qinersinermik allattaaviit**

Qinersisoqarnissaanik Qinersinermut Ataatsimiititaliap nalunaarutaa tiguneqareerpat qinersinermik siulersuisut qinersinermik allattaaviit allattuivigilissavaat. Tassani allatorneqassapput qinersinermut tunngassutillit pingaaruteqarnerusut. Qinersinermik allattaaviit allatorneqassapput qinersinerup piareersarneqarneraniit malittaralugu qinersinerup naatsorsorneqarnerata naammassinissaata tungaanut. Aamma taaguinermik siulersuisut qinersinermik allattaavimmik qinersinermik siulersuisut atugaattut allattaaveqassapput.

Qinersinermik allattaavinni, Qinersinermut Ataatsimiititaliamit nassiunneqarsimasuni, ilaatigut qinigassanngortitanik nalunaarutit tunniunneqarsimasut, taasiviit atorsinnaasut amerlassusii, taasiviit atorsinnaanngitsut amerlassusii aammalu sooq atorsinnaannginnerinut pissutaasut, kiisalu

qinersinerup inernerata inaarutaasumik naatsorsornera pillugu paasissutissat allatorneqartassapput, taasiartorfinilu tamani immikkut taamaaliorqartassaaq.

#### **4.6. Qinersinermi atortussat il.il atortussallu agguanneqarnerat**

Tamanut saqqummiussinermi allagarsiinermilu qinersinermik siulersuisut aamma taaguinermik siulersuisut atussavaat allagarsiutassat Qinersinermut Ataatsimiititaliamit nassiunneqarsimasut.

#### **4.7. Qinersiviit**

Kommunalbestyrelsimut qinersinermi kommuni qinersivik ataasiuvoq.

Nunaqarfimmi aqutsisunut qinersinermi nunaqarfik imaluunniit sumiiffik nunaqarfimmi aqutsisunik qinersiviusussaq qinersiviuvoq.

Ilagiit sinniisaannut qinersinermi sumiiffik oqaluffilik imaluunniit atuarfiutigaluni naalagiarfilik ilagiit sinniisaannut qinersiviusussaq qinersiviuvoq.

Qinersiviit taasiartorfiillu atuarneqarsinnaapput kommunalbestyrelsinut, nunaqarfimmi aqutsisunut ilagiillu sinniisaannut qinersisarneq pillugu Nalunaarummi nr.1, 24. januar 2005-imeersumi. Nalunaarut ilitsersuummi matumani ilanngussatut ilanngunneqarpoq.

## 5. Qinersisussat allassimaffii

### 5.1. Kommunalbestyrelsimut ilagiillu sinniisaannut qinersinissami qinersisussat allassimaffii

Ulloq qinersivissaq aalajangerneqareerpat qinersinermik siulersuisut inuit kingusinnerpaamik ullormi qinersivissami qinersisinnaatitaasutut piunasaqaatinik eqquutsitsisut kiisalu qinersivimmi pineqartumi inuit aqqisa nalunaarsorsimaffiannut nalunaarsimasut kikkunernerinik allattuiffiit suliarissavai.

- Qinersisussat allattorsimaffianni ilaatinneqassapput inuit qinersinissaq sioqqullugu kingusinnerpaamik sap. akunnerisa arfinilissaanni qinersivimmut **nuussimasut** aammalu kingusinnerpaamik ulloq taanna - **marlunngorneq 22. februar 2005** - nuunnerminnik kommunimi inuit aqqisa nalunaarsorsimaffiannut allatsissimasut.
- Qinersisartut qinersinissaq sioqqullugu kingusinnerpaamik sap. akunnerisa arfinilissaanni qinersiviup **iluani** nuussimasut aammalu kingusinnerpaamik ulloq taanna - **marlunngorneq 22. februar 2005** - nuunnerminnik kommunimi inuit aqqisa nalunaarsorsimaffiannut allatsissimasut najugarilikkaminni allassimallutik qinersisussat allassimaffiannut ilanngunneqassapput.
- Qinersisartut qinersinissaq sioqqullugu kingusinnerpaamik sap. akunnerisa arfinillit iluanni qinersiviup iluani nuussimasut imaluunniit ullormi tassanga kingusinnerusumi - 22. februar 2005 **kingorna** - nuunnerminnik nalunaaruteqarsimasut najugarisimasaminni najugalittut qinersisussat allattorsimaffianni nalunaarsorneqassapput.
- Qinersisartut qinersinissaq sioqqullugu kingusinnerpaamik sap. akunnerisa arfinillit iluanni qinersiviup **avataani** aalajangersimasumik najugaqarsimasut qinersinermik siulersuisunit qinersisussat allattorsimaffiannit peerneqassapput.

Qinersisussat allassimaffiat qinersiviup iluani taasiartorfiit ataasiakkaat tamaasa immikkoortortanngorlugit suliarineqassaaq.

Qinersisussat allassimaffianni allaffissaqassapput:

- qinersisartup atii tamakkerlugit
- ulloq, qaammat ukiorlu inunngorfik
- ilagiinnut ilaasortaaneq pillugu paasissutissaq
- kommunalbestyrelsimut qinersinermi krydsiliiffissaq
- ilagiit sinniisaannut qinersinermi krydsiliiffissaq

Ilagiinnut ilaasortaaneq pillugu paasissutissat tamanut saqqummiunneqassanngillat. Taamaattumik immikkut allagarsiussassamik suliaqartoqassaaq, tassanilu ilaatinneqassanngillat ilagiinnut ilaasortaaneq pillugu paasissutissat, qinersisartorli kinaluunniit pisinnaatitaavoq nammineq qanoq nalunaarsorneqarsimanini pillugu paasitinneqarnissaminut.

Qinersisussat allassimaffiat kingusinnerpaamik ulloq qinersivissaq sap. akunnerinik pingasunik sioqqullugu qinersivimmi kikkunnit tamanit takuneqarsinnaasunngorlugu ulluinnarni marlunni saqqumitinneqassaaq.

Qinersisussat allassimaffiat qinersiviup iluani taasiartorfiit ataasiakkaat tamaasa immikkoortortanngorlugit suliarineqarsimappat immikkoortortat tamarmik kikkunnilluunniit tikinneqarsinnaasumi saqqumitinneqassapput, qinersiviullu taasiartorfiini allani tamani saqqumitinneqassalluni qinersisussat allassimaffiata taasiartorfimmut atortup assilineri.

Qinersisussat allassimaffiata qaqugu sumilu saqqumitinneqarnissaa qinersinermik siulersuisut aalajangissavaat. Qinersisussat allassimaffiisa saqqummiunneqarnissaat sioqqullugu piffissaalluartillugu nalunaarutiginninneq pissaaq.

## **5.2 Nunaqarfimmi aqutsisunut qinersinissami qinersisussat allassimaffii**

Ulloq qinersivissaq aalajangerneqareerpat qinersinermik siulersuisut inuit kingusinnerpaamik ullormi qinersivissami qinersisinnaatitaasutut piumasaqaatinik eqquutsitsisut kiisalu qinersivimmi pineqartumi inuit aqqisa nalunaarsorsimaffiannut nalunaarsimasut kikkunerinik allattuiffiit suliarissavai.

- Qinersisussat allattorsimaffianni ilaatinneqassapput qinersisartut qinersinissaq kingusinnerpaamik ullunik 14-inik sioqqullugu nunaqarfimmut (qinersivimmut) nuussimasut aammalu kingusinnerpaamik ulloq taanna - marlungorneq 12. april 2005 - nuunnerminnik kommunimi inuit aqqisa nalunaarsorsimaffiannut allatsissimasut.
- Qinersisussat qinersinissaq sioqqullugu ullut 14 iluanni nunaqarfiup avataani aalajanger-simasumik najugaqalersimasut qinersisussat allattorsimaffiannit piarneqassapput.

Qinersisussat allassimaffianni allaffissaqassapput:

- qinersisartup atii tamakkerlugit
- ulloq, qaammat ukiorlu inunngorfik
- nunaqarfimmi aqutsisunut qinersinermi krydsiliiffissaq

Qinersisussat allassimaffiat suliarineqarnermi kingorna nunaqarfimmi kikkunnit tamanit takuneqarsinnaasunngorlugu ulluinnarni marlunni saqqumitinneqassaaq.

Qinersisussat allassimaffiata qaqugu sumilu saqqumitinneqarnissaa qinersinermik siulersuisut aalajangissavaat. Qinersisussat allassimaffiata saqqummiunneqarnissaa sioqqullugu piffissaalluartillugu nalunaarutiginninneq pissaaq.

## **5.3 Qinersisussat allattorsimaffii pillugit naammagittaalliuutit**

Kinaluunniit isumaqartoq nammineq imaluunniit inuk alla pissutissaqanngitsumik allassimaffimmi ilanngunneqarsimanngitsoq imaluunniit ilanngunneqarsimasoq, qinersisussat allassimaffiata saqqumitinneqarfissaata naanerata kingorna kingusinnerpaamik ulluinnat marluk qaangiutsinnagit qinersinermik siulersuisunut naammagittaalliornermut pissutaasut naatsumik taallugit allakkatigut naammagittaalliuuteqarsinnaavoq.

Qinersisussat allassimaffiat pillugu naammagittaalliuutit sapinngisamik piaarnerpaamik qinersinermik siulersuisunit aalajangiiffiqeqassapput. Qinersisussat allassimaffii tamatuma kingorna iluarsineqarsimasut qinersinermik siulersuisut siulittaasuannit atsiorneqassapput.

Qinersisartoq qinersisussat allassimaffiannit peerneqassasoq qinersinermik siulersuisut aalajangerpata, tamanna pillugu qinersisartoq qinersinermik siulersuisunit allaganngorlugu nalunaarfigineqassaaq. Nammineq inuulluunniit allap ilanngunneqarsimannginneranik naammagittaalliuut isumaqatigineqanngippat aamma qinersinermik siulersuisunit tamanna naammagittaalliuuteqartumut allaganngorlugu nalunaarutigineqassaaq.

Inuup qinersisinnaatitaannginnerminik naammagittaalliuuteqartup qinersisussat allassimaffiata iluarsineqarnerata kingorna ulluinaat marluk qaangiutsinnagit apeqquut allakkatigut saqqummiussinnaavaa Qinersinermut Ataatsimiititaliamut inaarutaasumik aalajangiisussamut. Qinersinermut Ataatsimiititaliap naammagittaalliortoq qinersinermilu siulersuisut attuumassuteqartut aalajangiinermik nalunaarfigissavai, tamatumalu kingorna qinersisussat allassimaffianni iluarsisassat qinersinermik siulersuisunit iluarsineqassapput.

Qinersisussat allassimaffianni ilanngunneqarsimaneq ilanngunneqarsimannginnerluunniit pillugit naammagittaalliuutit ilagiinnut immikkut tunngassuteqartut ingerlatinneqassapput.

**Kalaallit Nunaata Biskoppeqarfiani Biskoppi**

**Postbox 90**

**3900 Nuuk**

**Oqarasuaat 32 11 34**

**Fax 32 10 31**

Aammattaaq qinersisussat allassimaffianni allannguisoqarsinnaanngilaq taanna qinersinermik siulersuisunit iluarsineqareersimappat aammalu Qinersinermut Ataatsimiititaliap naammagittaalliummut aalajangiinera naapertorlugu iluarsineqareersimassapput.

Inuk qinersisussat allassimaffianni ilanngunneqarsimanngitsoq naammagittaalliornissamut piffissarititaasup qaangiutinnginnerani nammineerluni imaluunniit allap sulissuteqarneratigut qinersinermik siulersuisunut naammagittaalliuuteqarsimanngitsoq qinersisussat allassimaffianni ilanngunneqarnissani pillugu apeqquummik qinersinermik siulersuisunut imaluunniit Qinersinermut Ataatsimiititaliamut saqqummiussinnaanngilaq.

## **6. Qinigassannngortitsineq taakkuninngalu nalunaarutiginnineq**

### **6.1. Qinigassannngortissinnaatitaaneq**

Partiit qinersinermi qinigassannngortitsisinnaatitaapput partii inatsisartunut qinersinermi kingullermi inatsisartuni ilaasortaataitaqalersimappat sulilu tassani ilaasortaataitaqarpat. Kiisalu partiit nutaat qinigassannngortitsisinnaatitaapput kingusinnerpaamik qinersinissaq sioqqullugu sap. akunnerinik tallimanik sioqqutsillutik Qinersinermut Ataatsimiititaliamut nalunaarutigineqarsimagunik. Qinersinermut Ataatsimiititaliap partiimik akuersissuteqarnera qinersisoqareernissaata tungaanut atuutissaq, taamaattoq sivikinnerpaamik ukiumi ataatsimi.

Partiit kattusseqatigiinnissamik/qinigassannngorteqatigiinnissamik isumaqatigiissuteqarsinnaanngillat.

Peqatigiiffiit nunalu tamakkerlugu kattuffiit il.il. qinersinissamut qinigassannngortitsisut partiit qinigassannngortissinnaatitaanissaannut maleruaqqusanik naammassinnissimassapput qanorluunniit imminnut taaguusersimagaluarunik.

Qinigassannngortitat qinigassannngortissinnaapput

- partiip qinigassannngortitsisinnaatitaasup qinigassannngortitaatut
- kisimiillutik qinigassannngortittutut
- kisimiillutik qinigassannngortittutut kattusseqateqarlutik

Ilageeqarneq pillugu inatsisartut peqqussutaat sukkulluunniit atuuttoq naapertorlugu inuit ilagiit sinniisaanni ilaasortaareersussat tassunga qinerneqarsinnaanngillat.

### **6.2. Qinigassannngortitanik nalunaaruteqarneq, partii sinnerlugu qinigassannngortitsineq**

Partii sinnerlugu qinigassannngortittut nalunaarutigineqarnerat Qinersinermut Ataatsimiititaliap partiinut nalunaarsuiffissatut allaffissiatigut pissaaq.

Kommunalbestyrelsimut qinersinermi partiinut nalunaarsuiffissatut allaffissiaq *qorsuuvoq*.

Nunaqarfimmi aqutsisunut qinersinermi partiinut nalunaarsuiffissatut allaffissiaq *sungaartuuvoq*.

Ilagiit sinniisaannut qinersinermi partiit sinnerlugit *qinigassannngortitsisoqarsinnaanngilaq*.

Nalunaarut qinersivimmi taaguinermik siulersuisumut tunniunneqassaaq, taanna qinersinermik siulersuisut sinnerlugit tiguisussaammat.

Partiimik qinigassannngortitsinermi nalunaarsuiffimmi qinigassannngortittut aqqi, inuuii, atorfii najugaalu allassimassapput. Qinigassannngortittut qinersinissamut qinigassannngortinnertik namminneq atsiortutik uppersarsimassavaat. Nalunaarummi namminermi imaluunniit taassuma assilineqarnerani atsiortoqarsinnaavoq.

Partiinut nalunaarsuiffiit nalunaarutigineqarneri partiimi oqartussaasunit, partiip malittarisassai malillugit kommunalbestyrelsimut qinersinermut qinigassannngortitsinissamut akuerineqarsimasunit

atsiorneqarsimassapput. Qinersinermut siulersuisut tamatumunga uppersaassutissanik piunasaqarsinnaapput. Taamaattoqassappat partiip akisussaaffigaa uppersaassutissat pisariaqartut nassitissallugit.

Partiit qinigassanngortitsinermik akuersissutaat partiinut nalunaarsuiffiit assilineqarneri atsiornernik qulaani taaneqartunik ilaqartillugit taaguinermik siulersuisumut imaluunniit qinersinermik siulersuisunut nassiuunneqarnerisigut pisinnaapput.

Qinigassanngortitaq partii sinnerlugu qinigassanngortitatut nalunaarutaasoq partiimit akueriumaneqanngippat qinigassanngortitsineq atorsinnaanngitsutut isigineqassaaq. Taamatut pisoqarpat qinigassanngortittup pineqartup nammineq aalajangissavaa kisimiilluni qinigassanngortissanerluni.

### **6.3. Kisimiillutik qinigassanngortittut**

Qinigassanngortittunik partiit avataanni qinigassanngortitanik nalunaarut Qinersinermut Ataatsimiititaliap qinigassanngortittut pillugit allaffissiaasigut nalunaarutigineqartassaaq qinersivimmilu taaguinermik siulersuisumut tunniunneqassalluni, taanna qinersinermik siulersuisut sinnerlugit tiguisussaammat.

Kommunalbestyrelsimut qinersinermi qinigassanngortitanik nalunaarut *qorsuuvoq*.

Nunaqarfimmi aqutsisunut qinersinermi qinigassanngortitanik nalunaarut *sungaartuuvoq*.

Ilagiit sinniisaannut qinersinermi qinigassanngortitanik nalunaarut *aappilarujuttuuvoq*.

### **6.4. Kattusseqatigiit**

Qinersivimmi ataatsimi partiit avataanni qinigassanngortittut marluk amerlanerusulluunniit kattusseqatigiinnikkut tapersersoqatigiinniarlutik isumaqatigiissinnaapput.

Qinigassanngortittut kattusseqatigiinniarlutik isumaqatigiikkunik kattusseqatigiinni qinigassanngortittut tamarmik kattusseqateqarnissartik atsiornertut akuersissutigisimassavaat. Atsiornertut akuersissutit nalunaarummi namminerimi taassumaluunniit assilinerini nalunaarutigineqarsinnaapput.

Kattusseqatigiinni qinigassanngortitat ilaata qinigassanngortinnerminut nalunaarutaa kattusseqatigiinnit tamarmiusunit akuersissutigalugu atsiorneqarsimannippat qinigassanngortittoq kisimiilluni qinigassanngortittutut isigineqassaaq.

Qinigassanngortittoq kattusseqatigiinnut ataatsimit amerlanerusunut qinigassanngortissinnaanngilaq imaluunniit partiimut qinigassanngortitigaluni partiit avataanni qinigassanngortittunik allanik kattusseqateqarsinnaanani.

*Ilagiit sinniisaannut qinersinermi kattusseqatigiittoqarsinnaanngilaq.*

## 6.5. Qinigassanngortitsisut

Kisimiillutik qinigassanngortittut nalunaarutigineqarneri qinersivimmi qinigassanngortitsisunit ikinnerpaamik qulinit amerlanerpaamillu 20-nit atsiorneqarsimassapput, qinersivinnili qinersinissaq sioqqullugu ukiumi januarip aallaqqaataani 1.000-it inorlugit inulinni qinigassanngortitsisunit ikinnerpaamik tallimanit amerlanerpaamillu qulinit, atsiornerit nalunaarummi namminermi pisinnaapput taassumaluunniit assilineraniissinnaallutik. Nalunaarummi allassimassapput qinigassanngortitsisut tamarmik immikkut aqqi, inuuii, atorfi najugaallu. Qinigassanngortitsisut ilaat ataaseq nalunaarut pillugu qinigassanngortitsisut tamaasa sinnerlugit saaffigineqarsinnaasutut allassimassaaq. Qinigassanngortitsisut aqqi qinersisartumit allamit kimilluunniit piumasarineqarpata nalunaarutigineqassapput.

Kinaluunniit qinigassanngortittunut arlalinnut qinigassanngortitsisuusinnaanngilaq. Aamma qinersisartoq taamaallaat qinersivimmi qinersisartut nalunaarsorsimaffianni allassimaffimmini qinigassanngortittunut qinigassanngortitsisuusinnaavoq.

## 6.6. Ilagiit sinniisaannut qinersinissami qinigassanngortitsinissaq pillugu immikkut ataatsimiinneq

Ilagiit sinniisaannut qinersinissaq kingusinnerpaamik qaammatinik marlunnik sioqqullugu palasi palaseqarfiup pisorta qarfittut siulersuisua ilagiinnik ataatsimiigiaqqusissaaq, ataatsimiinnermi tassani pisorta qarfimmi siulersuisup taassuma imaluunniit taanna pisinnaanngippat palaseqarfimmi palasit arlaata imaluunniit ajoqip ilagiit sinniisaasa suliassaat nassuiaateqaatigissavai paasiniassallugulu ilagiit sinniisaannik naammattunik qinersinissap siunnersuutiginnissaa isumaqatigiissutigineqarsinnaanersoq.

Ataatsimiinnissamut taaneqartumut ataatsimiigiaqqusineqassaaq ataatsimiinnissap siornatigut sapaatini kingullerni pingasuni naalagiarnerni ataatsimiinnissap nalunaarutigineqarneratigut, qaqugu sumilu ataatsimiinnissaq oqaatigineqassalluni aammalu allagarsiinikkut kiisalu qinersinermik siulersuisut erseqqinnerusumik aalajangiinerisigut.

Ataatsimiinnissami tassani taamaallaat peqataasinnaapput inuit ilagiit sinniisaannik qinersisinnaati-taasut.

Qinigassanngortitat tamarmik naammattunik qinigassanngortitsisoqarlutik qinigassanngortinne-qarnerannik nalunaarutit tunniunneqassapput pineqartut ilagiit ataatsimiinneranni taaneqartumi qinigassanngortitaappata imaluunniit namminneq qinigassanngortissimappata.

Taamaallaat qinigassanngortitsisuusinnaapput inuit ilagiit sinniisaannut qinersisinnaatitaasut. Kinaluunniit qinigassanngortittumit ataatsimit amerlanerusunut qinigassanngortitsisuusinnaanngilaq.

## **7. Qinigassanngortitanik nalunaarutit pillugit immikkut aalajangersakkat**

### **7.1. Tunuartitsineq**

Qinigassanngortittup qinigassanngortitsinermik nalunaarut tunniunneqareersimasooq taaguinermik siulersuisumut kingusinnerpaamik qinigassanngortitanik nalunaaruteqarnissamut piffissaliussap naanerani tunuartissinnaavaa. Qinersisartoq qinigassanngortitsisut qinigassanngortittumik inassuteqarsimasooq inassuteqaamminik utertitsinnaanngilaq qinigassanngortitsinermik nalunaarut taaguinermik siulersuisumut tunniunneqareersimappat.

### **7.2. Qinigassanngortitat ikippallaarpata**

Qinigassanngortitanik nalunaaruteqarnissamut piffissaliussap naanerani qinersivimmi qinigassanngortitat qinersivimmi kommunalbestyrelsimut ilaasortassatut qinerneqartussaniit ikinnerusut nalunaarutigineqarsimappata qinersinermik siulersuisut qinersisartut kajumissaassavaat piffissaq erseqqinnerusumik taasaq naatinngu qinigassanngortitanik amerlanerusunik nalunaarutiginneqqullugit.

### **7.3. Qinigassanngortitanik nalunaarutit akuersissutigineqarnerat**

Taaguinermik siulersuisup qinigassanngortitanik nalunaaruteqarnissamut piffissaliussaq naaniariapat pilertornerpaamik telefaxikkut imaluunniit allatut iliornikkut qinigassanngortitanik nalunaarutit tigumasani allakkatigut qinersinermik siulersuisunut nalunaarutigissavai taakkunanilu qinigassanngortitsisut amerlassusii atorsinnaasut oqaatigalugit aammalu taaguinermik siulersuisup isumaa malillugu nalunaarutit inatsimmi piumasaasunik naammassinninersut paasissutissiissutigissallugu. Nalunaarutit ilanngullugit nassiunneqassapput.

Qinersinermik siulersuisut nalunaarut taanna tigoreerunikku inaarutaasumik aalajangissavaat nalunaarutit tiguneqarsimasut atorsinnaasutut isigineqassanersut.

Qinersinermik siulersuisut qinigassanngortitaq pinerluttulerinermik inatsisit naapertorlugit pineqaatissinneqarsimanera pissutigalugu qinigassanngortitat allassimaffianniit piiarsinnaanngilaat.

### **7.4. Kukkunernik iluarsiinissamut piffissaliineq**

Qinigassanngortitap nalunaarutigineqarnerani kukkuneqarsimappat taaguinermik siulersuisup pineqartoq kukkunerup iluarsineqarnissaanut ulluinnarnik marlunnik piffissalissavaa.

### **7.5. Tamanut nalunaaruteqarneq**

Qinersinermik siulersuisut partiit qinigassanngortittullu aqqi piaarnerpaamik tamanut nalunaarutigissavaat. Qinigassanngortittoq partii sinnerlugu qinigassanngortippat imaluunniit qinigassanngortittut arlallit kattusseqatigiissimappata, nalunaarummi tamanna taaneqassaaq.

### **7.6. Taasinertaqanngitsumik qinersineq**

Qinigassanngortitanik nalunaaruteqarnissamut piffissaliussap naanerani qinersivimmi qinigassanngortitat qinersivimmi kommunalbestyrelsimut ilaasortassatut qinerneqartussat amerlaqatigippatigut, qinersinermik siulersuisut kommunalbestyrelsimut qinersinissaq

taamaatiinnassavaat nalunaarutigalugulu qinigassanngortittutut nalunaarutigineqarsimasut taasinertaqanngitsumik qinigaasut.

Qinersinermik siulersuisut qinersinermut allattaavinni erseqqissumik nalunaassavaat kikkut qinigaasutut isigineqarnersut, qinigaasullu qinigaanerat pillugu allakkatigut nalunaarfigissallugit.

## **8. Taaguineq**

Qinersivinni taaguineq ingerlanneqassaaq inini taasiartorfinni kommunalbestyrelsinut, nunaqarfimmi aqutsisunut ilagiillu sinniisaannut qinersinerit pillugit Nalunaarummi taaneqarsimasuni. Taaguinermik siulersuisup taaguineq siulersussavaa.

### **8.1. Pappiarat taasiviit**

Qinersinermut Ataatsimiititaliap pappiarat taasivissat nassiussuutissavai qinersinermik siulersuisunut, taakkulu qinersinissaq sioqqullugu piffissalluartillugu taaguinermik siulersuisunut agguateqkissavaat.

#### ***Kommunalbestyrelsimut qinersineq***

Qinersinermut Ataatsimiititaliap taasivissat pisariaqartut ilusilersussavai siuartissallugillu. Maanna kommunalbestyrelsimut qinersinissami nutaatut periaaseq ima ingerlanneqassaaq, taasivissat krydsilerneqartussat atorneqassammata.

Taasivissaq krydsilerneqartussaq angallanngit allanilluunniit peqquteqarneq pissutigalugu anngutinngikkaluarpat taasivissat nutaanngitsut allaffigisassat atorneqassapput. Taasivissaq taanna qorsuuvoq angissuseralugulu 10x15 cm kalaallisut qallunaatullu naqitanik allagartaqarluni "Kommunimut qinersineq".

#### ***Nunaqarfimmi aqutsisunut qinersineq***

Taasineq pissaaq qinigassanngortittup imaluunniit partiip aqqata pappiaramut taasivissamut allanneratigut. Taanna sungaartuuvoq angissuseralugulu 10x15 cm kalaallisut qallunaatullu naqitanik allagartaqarluni "Nunaqarfimmi aqutsisunut qinersineq".

#### ***Ilagiit sinniisaannut qinersineq***

Taasineq pissaaq qinigassanngortittup aqqata pappiaramut taasivissamut allanneratigut. Taanna aappilarujuttuuvoq/aappalaartuuvoq angissuseralugulu 10x15 cm kalaallisut qallunaatullu naqitanik allagartaqarluni "Ilagiit sinniisaannut qinersineq".

### **8.2. Taaguinerup sivilissusia**

Ullormi qinersivimmi qinersineq ammarneqassaaq nal. 9.00 taaguinerlu ingerlanneqassalluni nal. 20.00 tungaanut, taamaattoq taaguineq naammassineqarsinnaavoq qinersisartut qinersisussat allassimaffianni allattorsimasut tamarmik taasereersimalerpata. Qinersisartut inimut qinersivimmut nal. 20.00 sioqqullugu takkussimasut inimili qinersivimmi ulapittoqarnera pissutigalugu pilertortumik taasisinnaanngitsut taasinissaminnut itigartinneqassanngillat taaguinerli ingerlatiinnarneqassaaq qinersisartut piffissaalluartillugu takkussimasut tamarmik taasereernissaasa tungaanut.

### **8.3. Ini qinersivik**

Qinersinermik siulersuisut isumagissavaat inimik qinersiveqarnissaa.

Qinersinermik siulersuisunut ilaasortat imaluunniit allat inatsisartut inatsisaanni aalajangersakkat malillugit inini pappiarat taasiviit tigoqqarneqarfianniissinnaatitaasut

- 1) taasisitsinerup nalaani qinersisartumik siunnersuissanngillat, ilitsersuissanatik kajumissaarissanatilluunniit qinigassanngortitaq kina taassaneraat,
- 2) allanik ilisimatitsissanngillat qinersisartuq una unalu najuussimanersoq, imaluunniit pappiaramik taasivimmik tuneqqusimanersoq tunniussisimanersorluunniit, imaluunniit
- 3) allanut nalunaarutiginnissanngillat taasivimmi qinersisartup qinigassanngortitamik imaluunniit partiimik sorlermik taasisimaneranik paasisimasaminik.

Qinersisartut aggerlutik taasinerata inatsisartut inatsisaanni peqqussutigineqartumiit allaanerusumik nakkutigineqarnissaa akuerisaanngilaq.

Aalajangersakkanik unioqquitsinerit pinerluttulerinermik inatsit malillugu pineqaatissinneqarnermik eqqartuunneqaataasinnaapput.

#### **8.4. Ineraq taasivik**

Taaguinermik siulersuisup inimi taasivimmi ineeqqamik taasiveqarnissaa isumagissavaa imatut ilusilimmik, taqqamani inuk nikorfasinnaassalluni ineeqqap silataaniit inunnit allanit takuneqarsinnaanani. Ineraq naammattumik qaammaqquteqassaaq, allannerit erseqqissumik atuarneqarsinnaallutik aammalu aqerluusamik nalinginnaasumik qernertumik peqassaaq allannermullu toqqavissamik manngertumik peqassalluni.

Ineraq taasivik assersuutigalugu tassaasinnaavoq puussiamik imaluunniit annoraaminermik sitserfeqanngitsumik ungalusaaq. Aamma ineraq tassaasinnaavoq ineraq pioreersoq inimut taasivimmut ilaareersoq, taamaattuussappat qulakkeerneqassaaq ineraq ataasiinnarmik isertarfeqassasoq, taamaalilluni nakkutigineqarsinnaalluni qinersisartup ataasiinnaap isersimanera.

#### **8.5. Taasinernut nakkartitsiviit**

Taasiartorfinni tamani ineeqqap taasiviup silataani minnerpaamik ataatsimik taasinernut karseqassaaq. Taasinernut karsit ataasiakkaat erseqqissumik nalunaaqutserneqarsimassapput, soorlu allagartalerlugit qalipaaserlugilluunniit qinersinernut ataasiakkaanut karsit arlaat atornersoq qinersisartumit nalornisoorutaasinnaajunnaarlugu.

Taasinernut karsit parnaarsimassapput sananeqarsimassallutillu pappiariat taasiviit taasinernut karsi ammaqqartinnagu ammunneqarsinnaajunnaarlugit. Tassa imaappoq karsip ammanera qinersisartup taasinerminik nakkartitsivissaa ima amitsigissaaq assak allaluunniit tassuuna manngunneqarsinnaassanani pappiaramik taasivimmik karsimiit tigusiniarluni. Taasivinnut karsi ima angitigissaaq ullormi qinersiviusumi pappiariat taasiviit tamaasa imarisinnaassallugit. Qinersiviit inuttuppata qinersinernut ataatsimut karsit arlallit atorneqarsinnaapput.

#### **8.6. Inimi qinersivimmi allagarsiutat**

Inimi qinersivimmi erseqqissunngorlugu inissitamik allagartaqassaaq, tassani allassimassallutik qinersivimmi qinigassanngortittut aqqi.

Qinigassanngortittoq partii sinnerlugu qinigassanngortitaappat imaluunniit inuit arlallit kattusseqatigiissimappata allagartaq tamatumunnga paasissutissanik imaqartinneqassaaq, qinigassanngortitat partiinut imaluunniit kattusseqatigiinnut immikkoortitaarneqarsimassapput. Allagartap taassuma assinga ineeqqami taasivimmi allannissami allequttap qulaatunginguani nivingatinneqassaaq.

Partiit tulleriinnilersorneqarneri pissapput naqinnerit tulleriinnilersorneqarnerat malillugu, kattusseqatigiit tulliullugit kisimiillutillu qinigassanngortittut kingulliullugit. Taakkunani aamma qinigassanngortittut naqinnerit tulleriinnilersorneqarnerat malillugu allatorneqassapput.

Qinersinermut Ataatsimiititaliap naqitertitai atorneqassapput:

- **Qorsuk** kommunalbestyrelsimut qinersinermi
- **Sungaartoq** nunaqarfimmi aqutsisunut qinersinermi
- **Aappilarujuttoq** ilagiit sinniisaannut qinersinermi

### 8.7. Nammineerluni qinersivimmukarneq

Qinersisoqassaaq nammineerluni inimit qinersivimmukarnikkut. Qinersisartut takkussuunnertik malillugu saaffiginnissapput. Taaguineramik siulersuisup nakkutigissavaa qinersiartortoq qinersisartut allassimaffianni allassimanersoq, taamaattoqanngippat taaguineramik siulersuisup pineqartoq nalunaarfigissavaa qinersinermi taasisinnaanngitsaq.

Taaguineramik siulersuisup qinersisussat allassimaffianni qinersisartup aqqa nalaatigut krydsilissavaa. Taava qinersisartooq qinersinernut tamanut qinersisinnaatitaaffigisaminut pappiaramik taasivissamik tunineqassaaq. Pappiarat taasivissat tunniunneqartut allaffigineqarsimassanngillat.

Malugeqquneqarpoq qinersisartut allakkatigut taasisimasut namminneerlutik takkukkunik qinersisinnaatitaasut. Taamatut pisoqarpat qinersisartup allakkatigut taasinera atorsinnaatitaanngitsutut nalunaaqutserneqassaaq allakkap puuatigut qaqortukkut ammarneqasimannngitsukkut allaffigineratigut. Allakkatigut taasineq atorsinnaatitaajunnaartoq taaguineramik siulersuisumit immikkoortillugu toqqortarineqassaaq.

Qinersisartup pappiara taasivissaq tigareeruniuk ineeqqamut taasivimmukassaaq allamik inoqartussaannngitsumut. Qinersisartup pappiara taasivik immersoreeruniuk peqissavaa kina taasimanerini allanit takuneqarsinnaajunnaarlugu. Taamaalioreeruni pappiara taasivik peqitaq karsimut nakkartitsivimmut taaguineramik siulersuisup isiginerani ikissavaa taamaalioreeruni ini qinersivik qimassallugu.

Qinersisartup pappiara taasivik kukkusumik immersorneratigut imaluunniit mianersuaalliornikkut atorsinnaajunnaartissimaguniuk allamik taarsertissinnaavaa. Allamik taarsertitsisoqarsinnaanngilaq pappiara taasivik karsimut nakkaatitsivimmut nakkartinneqareersimappat. Pappiara taasivik atorsinnaajunnaarsitaasimasooq taaguineramik siulersuisumit immikkoortillugu toqqortarineqassaaq.

## **8.8. Taasinissamut ikiuineq**

Qinersisartup pappiara taasivik pissusissaatut nammineerluni immersorsinnaanngippagu taaguinermik siulersuisup imaluunniit qinersisartup najuuttup qinersisartooq pineqartoq pisariaqarneratut ikiussavaa.

Qinersisartut angallarlunnertik pissutigalugu allamilluunniit assigisaanik peqquteqarlutik inimit taasivimmut isersinnaanngitsut taaguinermik siulersuisooq imaluunniit qinersisartooq najuuttoq isigitillugu inip taasiviup silatinnguani taasisinnaassapput.

Qinersisartooq tappiitsuuguni isigiarsuttuuguniluunniit taasinermini inummit najuuttumit, nammineq toqqakkaminit, taamaallaat ikiorneqarnissani piumasarisinnaavaa. Taamatut pisoqartillugu taaguinermik siulersuisooq imaluunniit qinersisartut najuuttut ikiuutissanngillat. Ilanngullugu malugiuk immikkoortooq 8.3.

*Qinersisartut takkussimasut tamarmik taasereerpata aatsaat taaguinermik siulersuisooq taasissaaq.*

## 9. Taasisutissanik allakkatigut nassitsinikkut taasineq

### 9.1. Taasineq

Qinersisartut taasinissamut piffissaliussat iluanni taasiartorfimmukarsinnaanngitsut imaluunniit aatsaat ajornartorsiorujussuarlutik taasiartorfimmukarsinnaasussat pappiaramik taasivimmik nassitsinermikkut taasisinnaapput (allakkatigut qinersineq).

Piumasaqaataanngilaq qinersisartuq qinersiviup qinersisussat allassimaffianniiffigisami avataaniinnini pissutigalugu taasiartorfimmukarsinnaannginnissaa.

Allakkatigut taasineq siusinnerpaamik pisinnaavoq qinersinissaq sap. akunnerinik arfinilinnik sioqqullugu, tassalu siusinnerpaamik

Kommunalbestyrelsinut ilagiillu sinniisaannut qinersinermut

*marlunngorneq 22. februar 2005*

Nunaqarfiit Aqutsisuinut qinersinermut

*Marlunngorneq 15. marts 2005*

Kalaallit Nunaanni allakkatigut taasineq taamaallaat pisinnaavoq taasiartorfinni ataani taaneqartuni:

- 1) Qinersisartut taasisinnaapput inuit aqqinik nalunaarsuiffimmi, tassunga ilanngullugu qinersivimmi qinersisussat allassimaffiannut allanneqarfigisimasaminni inuit aqqinik nalunaarsuiffimmi. Inuit aqqinik nalunaarsuiffittut aamma isigineqassapput Kalaallit Nunaanni inoqarfinni najugaqarfinnilu inuit aqqinik nalunaarsuisup ikiortai.
- 2) Napparsimmavinni imaluunniit peqqissartarfinni paarineqartarfinniluunniit allani uninngasut aammalu pinerluttulerinermik isumaginnittoqarfiup inissiisarfiani inissinneqarsimasut allakkatigut taasinerinik kommunimi qinersisinnaatitaasumik tigooraasussamik qinersinermik siulersuisut toqqaassapput. Inuk taanna inissisimaffiup pisortaa, taannalu pisinnaanngippat taassuma tullersortaa, peqatigalugu allakkatigut taasinerinik tigooraassaaq.
- 3) Qinersisartut inoqarfinni avinngarusimasuni immikkut taasiartorfiunngitsuni najugaqartut inummut qinersisinnaasumut qinersinermik siulersuisunit attavigisaminnit toqarneqarsimasumut taasisinnaapput.
- 4) Qinersisartut timmisartut mittarfiini, silasiorfinni il.il. kommunit aggornerisa avataaniittuni najugaqartut inummut Qinersinermut Ataatsimiititaliamit piginnaatitaasumut taasisinnaapput.

Kalaallit Nunaata avataani allakkatigut taasineq pisinnaavoq taasiartorfinni ataani taaneqartuni:

- 1) Qinersisartut Danmarkimiittut imaluunniit Savalimmiuniittut inuit aqqinik nalunaarsuiffimmi imaluunniit Namminersornerullutik Oqartussat Danmarkimi allaffianni taasisinnaapput.

- 2) Qinersisartut naalagaaffiup avataani najugaqartut qallunaat aallartitaqarfiini imaluunniit konsuleqarfiini taasisinnaapput.

Qinersisartut umiarsuarni Kalaallit Nunaanni angerlarsimaffeqartuniittut umiarsuup naalagaanit taassumaluunniit toqqagaanit taasisinneqarsinnaapput.

*Allakkatigut taasinernik tigooraasoq kinaluunniit qinersinissami nammineq qinigassanngortissimassanngilaq.*

## **9.2. Isertuussineq**

Allakkatigut taasinissami periarfissiisoqassaaq qinersisartup pineqartup allanit isigineqarani pappiaranut taasivinnut immersuisinnaanissaanut. Qinersinertorpiaq ilusiliilluni ineeqqamik taasivissaqartitsinissaq pisariaqanngilaq. Naammassaaq qinersisartup allattuiffissiami taamaaqataaniluunniit allanit akornusersorneqarani pappiaqqanik taasivinnik imersuisinnaanissaa. Allattuiffissiaq imaluunniit ineraaq taasivissaq inissinneqarsimassaaq nakkutigineqarsinnaassalluni qinersisussap pappiaqqat taasivissat il.il. qimagutissanngikkai.

## **9.3. Kinaassutsimut uppernarsaatit**

Taasinermi qinersisartut tamarmik piunaffigineqarnermikkut kinaassutsimut uppernarsaammik (biilnik ingerlatitsisinnaanermut uppernarsaat, pas, inuttut uppernarsaat taamaaqataaluunniit) takutitsissaaq, taamaalisoqareerpat allakkatigut taasinernik tigooraasup qinersisartumut tunniutissavai pappiara taasivissaq puussaqlunilu allakkanik nassitsissutitaqlunilu ungaluusartalik. Qinersinernut tamanut pappiarat taasiviit assiippat. Qalipaateqanngillat allassimallutillu "Allakkatigut taasivik".

## **9.4. Allakkatigut taasinissami atortussat**

### ***Kalaallit Nunaanni allakkatigut taasinermi:***

- Taasinermi atortussat pisariaqartinneqartut:
- ungaluusaq (allakkap puussaa 16x23 cm)
- allakkat nassitsissutit
- allakkap puussaa 11,5x16 cm aamma
- pappiara taasivissaq

Qinersinermut Ataatsimiititaliamit pissarsiarineqareerput. Taasineq taamaallaat atorsinnaavoq taasinermi atortussat taakku atorlugit taasisoqarsimappat.

### ***Kalaallit Nunaata avataani allakkatigut taasinermi:***

Danmarkimi inuit taasisinneqarnerannut allakkatigut taasinissami atortussatut Nunap iluani pissutsinut ministeriaqarfiup suliarititai atorneqassapput.

## **9.5. Periaaseq**

Qinersisartuq pappiaramik taasivimmik puussaqlunilu allakkanik nassitsissutitaqlunilu ungaluusartalimmik tunineqarniararluni taasissaaq aammalu allakkatigut taasinernik tigooraasup nakkutigisariaqarpaa taasinermit atortut allaffimmit pineqartumit qimagunneqannginnissaat.

Taasineq pissaaq qinersisartup pineqartup allanit isigineqarani pappiaramut taasivimmut qinersivimmi qinersisartup qinersisussat allassimaffianniiffigisaani qinigassanngortittut imaluunniit partiit arlaata aqqata allanneratigut. Qinersisartuq pineqartuq tappiitsuuppat imaluunniit isigiarsuttuuppat qinnuteqartoqarneratigut qinersisartuq taasinermini pisariaqarneratut ikiorneqassaaq immikkut maleruagassatut aalajangersakkat naapertorlugit.

Pappiara taasivik immersorneqareerpat qinersisartup pappiara taasivik allakkap puusnaanut (11,5 x 16 cm) ikissavaa, taamaalioreeruni qinersisartup allakkat nassitsissutit immersussavai taannalu atsiussallugu allakkatigut taasinernek tigooraasoq isigitillugu.

Peqqissartarfinni, pinerluuteqarsimasunut inissiisarfinni imaluunniit inoqarfinni avinngarusimasuni taasineq inuit aqqinik nalunaarsuiffinni taasinerit assigalugit ingerlanneqassaaq, taamaattoq allakkat nassitsissutit atsiorneqassapput sumiiffiup pisortaa taassumaluunniit tullersortaa aammalu allakkatigut taasinernek tigooqqaasussatut kommunalbestyrelsip toqqagaa isigitillugit.

Qulaani taaneqartut naapertorlugit allakkap nassitsissutip atsiorneqarnerani isiginnittut allakkatigut nassitsissutini uppenarsaasutut atsiorfissakkut atsiussapput.

#### **9.6. Allakkatigut taasinernek tigooraasup uppenarsaanera**

Inassutigineqarpoq uppenarsaat uppenarsaasup atsiornerata saniatigut uppenarsaasup naqissutaanik imaluunniit - taamaattumik pigisaqanngippat - oqartussaasup uppenarsaasuusup aqqa (soorlu: NN kommuniani inuit aqqinik nalunaarsuisoq) naqissuserneqassasoq.

#### **9.7. Allakkatigut taasinernek tigooraasup nassiussinera**

Uppenarsaatissaq immersorneqareerpat qinersisartup puusaaq pappiaramik taasivimmi imalik allakkallu nassitsissutit ungaluusamut (allakkap puusaa 16 x 23 cm) taakkununga atugassiamut ikissavai nipitillugulu matullugu qaatiguuliussallugillu kommunalbestyrelsimut qinersisartup qinersisussat allattorsimaffiannut ilanngunneqarfigisimasaanut. Aammalu ungaluusap tunuani immersugassaaq immersorneqassaaq erseqqissumik allallugit qinersisartup aqqi, inuuia kommunimilu taaneqartumi najugaa. Kiisalu saneraani immersugassami krydsiliisoqassaaq nalunaarlugu qinersinermut sorlermut pappiara taasivik atornersoq. Ungaluusaaq imaalu tunniunneqassapput taasivigineqarsimasumut.

Ungaluusaaq il.il. Allakkerivik aqqutigalugu nassiunneqassappat qinersisartup nammineq akilissavaa. Ungaluusap ataatsip taamaallaat pappiara taasivik ataaseq allakkallu nassitsissutit ataatsit imarissavai. Ungaluusamik qinersisartumeersumik tiguisup akisussaaffigaa puusap kommunalbestyrelsimut nassitsivissamut piaartumik nassiunneqarnissaa.

Allakkatigut taasinernek atortussat nassiunneqartut ernerluni kommunalbestyrelsimut allakkanit allanit immikkoortinneqarsinnaaqullugu nassiussineq pissaaq ungaluusami atugassami allakkat puusaanut allamut ikineqartussaannngitsumi.

## 9.8. Allakkatigut taasinerup tiguneqarnera

Puussaq nassiunneqartoq piffissaalluartillugu kommunalbestyrelsimit pineqartumit tiguneqareersimassaaq qinersinermik siulersuisut isumagisinnaassallugu puussap qinersinerup aallartinnginnerani taaguinermik siulersuisumit tiguneqareersimanissaa sapinngisamik pisinnaaqqullugu.

Puussat tiguneqarsimasut ammarneqarnatik ernerlutik taasiartorfimmi qinersisartup pineqartup najugaatut puussami taaneqarsimasumi taaguinermik siulersuisumut ingerlateqqinneqassapput. Puussat *taaguineq naammassineqartinnagu* taaguinermik siulersuisumit tiguneqareersimassapput. Taaguinerup naammassineqareernerani puussat taaguinermik siulersuisumit ammarterneqassapput, misissorneqassaarlu puussamik nassitsisoq qinersisussat allassimaffianniinnersoq, taamaassimappat ernerluni qinersisartup qinersisussat allassimaffianni aqqata nalaatigut krydsiliineqassaaq, pineqartoq nammineerluni takkulluni taasereersimanngippat.

Paasineqarpat pineqartoq:

- 1) nammineerluni takkulluni taasereersimasoq
- 2) qinersisussat allassimaffianni ilanngunneqarsimanngitsoq
- 3) qinersineqartinnagu toqoreersimasoq

allakkat nassitsissutit aamma allakkap puussaa ammarneqanngitsoq ungaluusamut ikeqqinneqassaaq naatsorsuutigeqqinneqassananilu. Aamma taamaappoq puussaq allamik imaluunniit allakkanik nassitsissutinik ataasiinnaanngitsunik allakkalluunniit puuannik ataasiinnaanngitsumik imaqarpat, imaluunniit puussap, allakkat puuata allakkalluunniit nassitsissutit isikkuatigut isumaqarnarpat Namminersornerullutik Oqartussanit imaluunniit Nunap iluani pissutsinut ministeriaqarfimmit suliarineqarsimasuunngitsoq, imaluunniit immersorneqarnerat, uppersarneqarsimanerat atsiornerat nassiunneqarneralluunniit peqqussutigineqartut malillugit pisimanngippat.

Allakkap puussai taasinerup ilanngunneqarsinnaappata taasinerup nakkaatitsivinnut nakkartinneqassapput pappiaranullu taasivinnut akulerutsinneqassallutik aatsaallu ammarneqassallutik taasinerit kisinneqalerpata.

Ungaluusat taasinerup naammassineqareerneratigut taaguinermik siulersuisunit tiguneqartut ammarneqaratik paarineqassapput ilanngunneqarsinnaanngitsutullu isigineqassallutik.

Qinersinerup kisinneqarnerani ungaluusat, allakkat nassitsissutit aammalu allakkap puussai pappiarallu taasiviit tigummeneqassapput.

## 9.9. Atortuusitsinninnissamut immikkut maleruagassat

Allakkatigut taasinerit atortuusinnaanerit eqqarsaatigalugu oqaatigineqassaaq pappiara taasivik atortuutinneqarsinnaanngimmat

- 1) allaffigineqarsimanngikkuni

- 2) erseqqissumik takuneqarsinnaanngippat partiit arlaat sorleq imaluunniit qinigassanngortittoq partiit avataanniittoq sorleq qinersisartup taaniarsimaneraa
- 3) allakkat puussaat (mikineq) allamik imaqarpat imaluunniit pappiaranik taasivinnik ataatsimit amerlanerusunik imaqarpat
- 4) pappiarap taasiviup isikkua malillugu isumaqarnarpat pappiara taasivik inatsit naapertorlugu suliarineqarsimasuunngitsoq imaluunniit pissusissat naapertorlugit immersorneqarsimanngippat.

Taasivissaq krydsiligassaq anngussimanngippat taasivissaq nutaanngitsoq atorineqarsimappat:  
Qinersisartup qinigassanngortittup aqqa taassumalu partiata taaguutaa ilanngullugu allassimappagit taasineq qinigassanngortittumik taasinertut isigineqassaaq.

Oqaatigineqassaaq pappiarat taasiviit fyldepen imaluunniit kuglepen atorlugit immersorneqarsimasut atorsinnaasutut isigineqassasut.

## 10. Qinersinermi taasinernik kisitsineq

### 10.1. Taasanik kisitsineq pillugu ataatsimut aalajangersakkat

Taaguineq naammassiniariapat taaguinermik siulersuisup allakkatigut taasinerit taasinernut nakkaatitsivinnut immikkoortoq 9.8.-mi allaaserineqartut malillugit nakkartissavai. Taaguinermik siulersuisup taamaalioreeruni immikkut poortugakkuutaarlugit allakkatigut taasiviit atorsinnaangitsut, pappiarat taasiviit atorsimangitsut aammalu pappiarat taasiviit allamik taarsigassatut utertinneqarsimasut qilersussavai.

Taamaalioreeruni taaguinermik siulersuisup najuuttut isigitillugit karsi taasivinnut nakkaatitsivik ammassavaa taasinerillu kisillugit uppernarsissallugulu taasinerit amerlassusaat qinersisussat allassimaffianni taasisimasutut allatorneqarsimasutut amerlatiginersut.

Qinersinernut tamanut taasinerit immikkut kisinneqassapput, kommunalbestyrelsimut qinersinermi taasinerit siulliullugit kisinneqassapput. Taasiartorfimmi nunaqarfimmi aqutsisunut qinersineqarsimappat qinersinermut tassunga taasinerit tulliullugit kisinneqassapput. Ilagiit sinniisaannut qinersinermi taasinerit kingulliullugit kisinneqassapput.

Inuit qinersisinnaatitaasut ikinnerpaamik marluk qinersinermi taasinernik kisitsinermik tamanut ammasumi malinnaajartorlutik najuukkiartorsimangippata taaguinermik siulersuisoq qinersisinnaasut akornanni inunnik marlunnik uppernarsaasussat najuuttussanik aggersaassaaq.

### 10.2. Kommunalbestyrelsimut nunaqarfimmilu aqutsisunut qinersinerit kisinneqarnerat

Pappiarat taasiviit iluarsaaneqassapput pappiarat taasiviit

- 1) partiimut taassumalu qinigassanngortitaanut,
- 2) kattusseqatigiillutik qinigassanngortittunut aamma
- 3) qinigassanngortittunut partiit kattusseqatigiillu avataanniittunut.

Taamaalereerpata partiinut qinigassanngortitsisunut, kattusseqatigiinnut tamanut aammalu partiit avataasigut qinigassanngortittunut tamanut taasinerit qanoq amerlassuseqarnerisut kisinneqalissapput.

Taaguinermik siulersuisup tamatuma kingorna partiinut, kattusseqatigiinnut aammalu partiit avataasigut qinigassanngortittunut ataasiakkaanut tamaasa ataasiakkaarlugit naatsorsuusiussavai taasinerit qassit qinigassanngortittunut ataasiakkaanut tunngatinneqassanersut.

Taasinernik kisitsineq *naammasseriiginnartoq* taasinernik nutaamik kisitsisoqalissaaq, kisitsinerit marluk tulleriit assigiimmik inerneqalernissaasa tungaanut. Malugiuk ullup qinersiviup unnukkuani kisitseqqinnerup kingornatigut kisitseqqittoqarnissaa akuerisaajunnaarmat.

Qinersinermik allattaavimmi partiit qinigassanngortittullu nalunaarsorneqassapput. Allatorneqassaaq partiit ataasiakkaat taasinernik qasseraarsimanersut, aammalu allanneqassallutik

partiiit ataasiakkaat sinnerlugit aammalu partiiit avataanni qinigassanngortittut tamarmik immikkut qassinik taaneqarsimanersut.

Taasiartorfimmi qinersinerup inernerata taaguinermik siulersuisup ingerlaannarluni qinersinermik siulersuisunut nalunaarutigissavaa.

### **10.2.1. Atorsinnaanngitsitsinermut pissutissat**

Pappiara taasivik atorsinnaanngitsutut isigineqassaaq:

- 1) allaffigineqarsimanngikkuni
- 2) erseqqissumik takuneqarsinnaanngippat partiiit arlaat sorleq imaluunniit qinigassanngortittoq partiiit avataanniittoq sorleq qinersisartup taaniarsimaneraa
- 3) pappiarap taasiviup isikkua malillugu isumaqarnarpat pappiara taasivik inatsit naapertorlugu suliarineqarsimanngitsoq.

Taasivissaq krydsiligassaq kommunalbestyrelsinut qinersinermi atugassaq anngussimanngippat taasivissaq nutaanngitsoq atorineqarsimappat: Qinersisartup qinigassanngortittup aqqa taassumalu partiiata taaguutaa ilanngullugu allassimappagit taasineq qinigassanngortittumik taasinerit isigineqassaaq. Tamanna nunaqarfiit aqutsisuinut qinersinermi atuupportaaq.

Pappiara taasivik atorsinnaanngitsutut ineqarpat tamanna qinersinermik allattaavimmi taaguinermik siulersuisup allattuiffigisaani allanneqassaaq atorunnaarsitaanerannullu tunngaviusoq naatsumik taaneqarluni.

### **10.3. Ilagiit sinniisaannut qinersinerup kisinneqarnera**

Taaguinermik siulersuisup qinigassanngortittunut ataasiakkaanut taasinerit naatsorsussavai. Taasinermik kisitsineq *naammasseriiginnartoq* taasinerit nutaamik kisitsisoqalissaaq kisitsinerit marluk tulleriit assigiimmik inerneqalernissaasa tungaanut. Malugiuk ullup qinersiviup unnukkuani kisitseqqinnerup kingornatigut kisitseqqittoqarnissaa akuerisaajunnaarmat.

Qinersinermik allattaavimmi qinigassanngortittut nalunaarsorneqassapput. Allattorneqassaaq qinigassanngortittut ataasiakkaat taasinerit qasseraarsimanersut.

Taasiartorfimmi qinersinerup naatsorsorneqarnerata inernerata ernerluni taaguinermik siulersuisumit qinersinermik siulersuisunut nalunaarutigineqassaaq. Qinersinermik siulersuisut aalajangersinnaavaat qinersivinni ataasiinnarmik taasiartorfeqartuni qinersinerup inernerata inaarutaasumik taaguinermik siulersuisumit naatsorsorneqarnissaa, taassuma naatsorsuereeruni ernerluni qinersinerup inernerata qinersinermik siulersuisunut nalunaarutigissavaa.

#### **10.3.1. Atorsinnaanngitsitsinermut pissutissat**

Pappiara taasivik atorsinnaanngitsutut isigineqassaaq:

- 1) allaffigineqarsimanngikkuni

- 2) erseqqissumik takuneqarsinnaanngippat qinigassanngortittoq sorleq qinersisartup taaniarsimaneraa
- 3) pappiarap taasiviup isikkua malillugu isumaqarnarpat pappiara taasivik inatsit naapertorlugu suliarineqarsimasuunngitsoq.

Pappiara taasivik atorsinnaanngitsuutinneqarpat tamanna qinersinermik allattaavimmi taaguinermik siulersuisup allattuiffigisaani allanneqassaaq atorunnaarsitaaneranullu tunngaviusoq naatsumik taaneqarluni.

## **11. Taasinerup inernerera**

Qinersinermik siulersuisut inernerit taaguinermik siulersuisunit tigoreerunikkit ingerlaannartumik Qinersinermut Ataatsimiititaliamut nalunaarutigissavaat. Nalunaarummi ilanngullugit taaneqassapput taasiartorfinni ataasiakkaani qinersisinnaatitaasut qassiuneri aammalu qinersinermut atatillugu pissutsinik immikkut ittunik qinersinerup inerneranut sunniuteqarsinnaasunik atuuttoqarsimanersoq oqaatigineqassalluni.

Tamatuma kingorna qinersinermik siulersuisut kommunimi qinersinerup tamakkerluni inernerera naatsorsussavaat immikkoortoq 11.1-imi kommunalbestyrelsinut nunaqarfimmilu aqutsisunut qinersinerit pillugit taagorneqartut malillugit ammalu immikkoortoq 11.2-mi ilagiit sinniisaannut qinersineq pillugu taagorneqartut malillugit imaluunniit akuersissutigissallugu ilagiit sinniisaannut (takuuk immikkoortoq 10.3.) qinersinermi qinersivimmi taasiartorfik ataasiinnaappat taaguinermik siulersuisut taasinerik kisitsinerat.

Tamatuma kingorna qinersinermik siulersuisut qinersinernut ataasiakkaanut tamanut qinersinermik allattaavimmut allassavaat kikkut ilaasortassatut qinigaasutut isiginerini, taavalu qinigaasut qinigaanerannik allaffigissallugit.

### **11.1. Kommunalbestyrelsinut nunaqarfimmilu aqutsisunut qinersinermi qinersinerit inernerisa kisinneqarnerat**

Qinersinerit tamarmik immikkut naatsorsorneqassapput makkununga agguataarlugit

- partiit ataasiakkaat taakkulu qinigassanngortitaat
- katusseqatigiit ataasiakkaat qinigassanngortitaat
- kisimiillutik qinigassanngortittut ataasiakkaat.

Tamatuma kingorna qinersivimmi (kommunimi nunaqarfimmiluunniit) taasinerit katinneri tamarmiusut partiimut, katusseqatigiinnut aamma kisimiillutik qinigassanngortittut ataasiakkaat taasisaasa katinneri 1-istik, 2-istik, 3-istik kommunalbestyrelsimilu ilaasortaasinnaasut amerlassusaat tikillugu agguartiterneqassapput. Taamaattoq kisimiillutik qinigassanngortittunut taasinerit taamaallaat 1-istik agguarneqassapput kisimiilluni qinigassanngortittoq kisimi qinigaasinnaammat qanorluunniit amerlatigisunit taagorneqarsimagaluaruni.

Siulliulluni ilaasortanngussaaq partii, katusseqatigiit imaluunniit kisimiilluni qinigassanngortittoq amerlanerpaamik taaguunneqarsimasoq, tulliulluni ilaasortanngussalluni partii, katusseqatigiit imaluunniit kisimiilluni qinigassanngortittoq amerlanerpaamut tulliulluni taaguunneqarsimasoq qinersivimmi ilaasortaaffissat tamakkerlutik partiinut, katusseqatigiinnut imaluunniit kisimiillutik qinigassanngortittunut agguanneqarsarlugit.

Qinersivimmi ilaasortaaffiit partiimit katusseqatigiiffimmiilluunniit ilaasortaaffigineqalersussat partiip katusseqatigiiffiilluunniit qinigassanngortitaanut agguanneqassapput qinersivimmi siulliulluni ilaasortanngussalluni partiip katusseqatigiiffiilluunniit qinigassanngortitaat amerlanerpaamik taaguunneqarsimasoq, qinersivimmi tulliulluni ilaasortanngussalluni partiip

kattusseqatigiiffiulluunniit qinigassanngortitaa amerlanerpaamut tulliulluni taaguunneqarsimasoq  
ilaasortaaffiit tamakkerlutik qinigassanngortittunut agguanneqarserlugit.

Ilaasortaaffiit agguanneqarneranni periaasissaq kinguliani assersuummi takutinneqarpoq.  
Assersuummi taamaallaat partiit pineqarput, periaaserli taanna aamma atorneqassaaq  
kattusseqatigeeqarpat aammalu kisimiilluni qinigassanngortittoqarsimappat.

**Assersuut:**

Qinersivimmi taasisinnaatitaasut 849-pput, taasinerit atorsinnaasut 690-iupput, taasisussat sinneri taasiartorsimangillat imaluunniit taasineri atorsinnaanatik. Qinersivimmi ilaasortaaffiit katillugit arfineq-marluk agguanneqassapput. Partiit pingasut qinigassanngortitsisimasut tamarmik tallimanik qinigassanngortitaqarsimapput. Taasinerit imatut agguataarsimapput:

Partii I'p taaguisui:	Partiimut taasinerit	taasinerit 72
	Qinigassanngortitaq A	taasinerit 24
	Qinigassanngortitaq B	taasinerit 134
	Qinigassanngortitaq C	taasinerit 17
	Qinigassanngortitaq D	taasinerit 25
	Qinigassanngortitaq E	taasinerit 55
Katillugit		taasinerit 327

Partii II'p taaguisui	Partiimut taasinerit	taasinerit 18
	Qinigassanngortitaq A	taasinerit 8
	Qinigassanngortitaq B	taasinerit 15
	Qinigassanngortitaq C	taasinerit 49
	Qinigassanngortitaq D	taasinerit 5
	Qinigassanngortitaq E	taasinerit 7
Katillugit		taasinerit 102

Partii III'p taaguisui	Partiimut taasinerit	taasinerit 20
	Qinigassanngortitaq A	taasinerit 70
	Qinigassanngortitaq B	taasinerit 25
	Qinigassanngortitaq C	taasinerit 10
	Qinigassanngortitaq D	taasinerit 5
	Qinigassanngortitaq E	taasinerit 11
Katillugit		taasinerit 141

Partiinut taasinerit tamarmiusut 1-imik, 2-mik, 3-mik il.il. agguarneqassapput. Agguaneq ingerlanneqassaaq qinersivimmi ilaasortaaffissat tamarmiusut partii nut agguanneqarnissaasa tungaanut. Agguanerit tamaasa partiimut taasinerit tamarmiusut katinnerat agguarneqartassaaq. Agguanerit inernerit imaassapput: (qupp. tulliani)

	Partii I	Partii II	Partii III
Agguaaneq siulleq	327 (1)	102 (5)	141 (3)
Agguaanerup aappaa	163,5 (2)	51	70,5 (7)
Agguaanerit pingajuat	109 (4)	34	47
Agguaanerit sisamaat	81,75 (6)	25,5	35,25
Agguaanerit tallimaat	65,4		

Kisitsisit ungaluusikkat takutippaat partiit qanoq tulleriinneqarlutik ilaasortanngortitsisimanersut.

Taamaalilluni ilaasortaaffinnik agguaaneq imaassaaq:

Partii I'p ilaasortaaffiit 1, 2, 4 aamma 6 pissarsiarai, katinneranni ilaasortaaffiit sisamat

Partii III'p ilaasortaaffiit 3 aamma 7 pissarsiarai, katinneranni ilaasortaaffiit marluk

Partii II'p ilaasortaaffik 5 pissarsiaraa, katinnerani ilaasortaaffik ataaseq

Assersuummi sisamariaannarluni agguaanissaq pisariaqarpoq, tassa qinersivimmi ilaasortaaffiit tamarmik agguaanneqarmata sisamariarluni agguaasoqareerneratigut.

### **11.1.1. Taasinerit amerlaqatigiippata**

Partiit, katusseqatigiit kisimiillutilluunniit qinigassanngortittut arlallit amerlaqatigiimmik taaguunneqarsimappata tannermoornikkut aalajangerneqassaaq kia arlaata ilaasortaaffik pissarsiarissaneraa. Aamma taamatut pisoqassaaq partiip imaluunniit katusseqatigiit akornanni ilaasortaaffinnik agguaanermi partiip imaluunniit katusseqatigiit qinigassanngortitaasa arlallit akornanni amerlaqatigiimmik taaguisoqarsimappat.

Tannermoortitsineq ingerlanneqassaaq qinersinermik siulersuisunit, tannermoortitsineq ingerlanneqassaaq qinersinerup naatsorsorneqarnerata kinguninnguatigut. Tannermoortitsineq ingerlanneqassaaq qinersisartut allat isigitillugit.

Qinersinermik siulersuisut isumagisariaqarpat qinigassanngortittut tannermoortitsivissap ungasinngisaani najugaqartut najuukkallartulluunniit ajornanngippat tannermoortitsinermi najuuttussatut aggersarneqarnissaat. Periaasissaq nalornisoorutigineqassagaluarpat Qinersinermut Ataatsimiititaliaq paasiniaavigineqassaaq.

### **11.1.2. Sinnisussanik nalunaarsuiffik**

Tamatuma kingorna qinersinermik siulersuisut sinnisussanik nalunaarsuiffik suliarissavaat. Nalunaarsuiffimmi allatorneqassapput qinigassanngortittut qinigaasimanngitsut, kisiannili sinnisussatut kommunalbestyrelsimi pisinnaanngitsoqarneratigut ilaasortaasinnaatitaasut.

Sinnisussanik nalunaarsuiffik partiinut katusseqatigiinnullu ataasiakkaanut suliarineqartassaaq. Nalunaarsuiffinni taakkunani allatorneqassapput qinigassanngortittut qinigaanngitsulli taagorneqarnertik malillugu tulleriinnilersorneqassallutik.

Sinniisussanik nalunaarsuiffimmi qinigassanngortittut arlallit amerlaqatigiinnik taaguunneqarsimappata tulleriinnilersuineq qinersinermik siulersuisut tannermoortitsineratigut ullup qinersiviup unnukkuani aalajangerneqassaaq.

### **11.2. Ilagiit sinniisaannut qinersinermi qinersinerup inernerata kisinneqarnera**

Taasiartorfinni ataasiakkaani qinigassanngortittunut ataasiakkaanut taasinerit naatsorsorneqassapput.

Qinersinerup naatsorsorneqarnerani siulliulluni ilaasortanngussaaq inuk amerlanerpaanit taagorneqarsimasoq, tulliulluni ilaasortanngussalluni inuk amerlanerpaanik taagorneqarsimasup tulliatut taagorneqarsimasoq ilagiit sinniisaanni inissat tamakkerlugit agguanneqarserlugit.

Qinigassanngortitat arlallit amerlaqatigiimmik taagorneqarsimappata taaguinermik siulersuisup tannermoortitsineratigut aalajangerneqassaaq arlaat kina qinigaanersoq.

Sinniisussanik nalunaarsuiffik suliarineqassaaq, tassani allatorneqassapput qinigassanngortissimasut qinigaanngitsulli taaguunneqarnertik malillugu tulleriinnilersorneqarlutik. Qinigassanngortittut arlallit amerlaqatigiinnik taaguunneqarsimappata tannermoortitsinikkut tulleriinnilersuineq aalajangerneqassaaq.

Ullup qinersiviup unnukkuani qinersinerup inernerata naatsorsorneqassaaq aammalu sinniisussanut nalunaarsuiffik suliarineqassalluni tannermoortitsisoqartariaqarpallu tannermoortitsisoqassalluni.

### **11.3. Qinersinermut atortut il.il. nassiunneqarnerat**

Kingusinnerpaamik qinersinerup aqaguani taaguinermik siulersuisup pappiarat taasiviit qilertakkuutaarlugit pappiaranik taasivinnik atorsinnaasunik, pappiaranik taasivinnik allaffigineqarsimannngitsunik allanillu atorsinnaanngitsunik imaqartillugit poortussavai. Pappiarat taasiviit taakku aammalu pappiarat taasiviit atorneqarsimannngitsut, pappiarat taasiviit taarserlugit utertinneqarsimasut aammalu allakkatigut taasiviit qinersisartup nammineq takkulluni taasiartorsimanera pissutigalugu atorsinnaajunnaarsitaasut, qinersisussat allassimaffii atorneqarsimasut aammalu qinersinermik allattaavik taaguinermi siulersuisuunit immersorneqarsimallunilu atsiorneqarsimasoq ilanngullugit qinersinermik siulersuisunit piaarnerpaamik nassiunneqassapput.

Qinersinermik siulersuisut atortussat taagorneqartut kommunimi taasiartorfinnit tamanit tigoreerunikkit qinersinermik allattaaviit nuutinneri Qinersinermut Ataatsimiititaliamut nassiutissavaat.

Tamatuma kingorna - taamaattoq qinersinerup kingorna siusinnerpaamik sap. ak. marluk qaangiutereerpata - qinersinermik siulersuisut ataatsimiissapput qinersinerup ingerlanneqarsimasup atorsinnaassusia aalajangerniarlugu. Ataatsimiinnermut tassunga qinigassanngortittut qinigaasutut isigineqartut aggersarneqassapput.

#### 11.4. Naammagittaalliuuteqarneq

Qinigassanngortittut qinigaasimagunik qinigaasimanngikkunilluunniit aammalu kialluunniit qinersivimmi qinersisartup qinersinerup atorsinnaassusia naammagittaalliuutigisinnaavaa.

Naammagittaalliorneq pissaaq allakkatigut, akerliliinermut pissutaasoq naatumik oqaatigalugu, taasiartorfimmilu pineqartumi taaguinermik siulersuisumut nassiunneqassalluni kingusinnerpaamik qinersinerup kingorna ullut arfineq-marluk qaangiutsinnagit. Taaguinermik siulersuisup naammagittaalliuut oqaaseqaatigisariaqarsorisaminik ilallugu piaarnerpaamik qinersinermik siulersuisunut ingerlateqqissavaa.

Qinersinermik siulersuisuni ilaasortaq naammagittaalliuuteqarpat, naammagittaalliuullu taaguiffimmi pineqartumi taaguinermik siulersuisumut saqqummiunneqarsimanngippat, apeqqutip aalajangiiffigineqarnissaa kinguartinneqassaaq taama oqaaseqaateqartoqarnissaata tungaanut.

Qinersineq qinersinermik siulersuisuni amerlanerussuteqartunit atortussaajunnaarsinneqanngikkuni akuerineqartutut isigineqassaaq.

Qinersinermik siulersuisut aalajangiineri qinersinermik allattaavimmut allanneqassapput qinersinermilu allattaaviup nuutinneqarnera Qinersinermut Ataatsimiititaliamut nassiunneqassaaq.

Qinersinermik siulersuisut naammagittaalliuutit tiguneqarsimasut pillugit aalajangiineri aalajangiinermi ullut arfineq-marluk qaangiutsinnagit Qinersinermut Ataatsimiititaliamut ingerlateqqinneqarsinnaapput, taassuma aalajangiinera inaarutaassalluni. Qinersineq pillugu qinersinermik siulersuisunut naammagittaalliuuteqarsinnaatitaasut aamma naammagittaalliuuteqarsinnaatitaapput. Naammagittaalliuut qinersinermik siulersuisunut pineqartunut allakkatigut tunniunneqassaaq, taassumalu taanna piaarnerpaamik Qinersinermut Ataatsimiititaliamut ingerlateqqissavaa oqaaseqaatitalerlugu.

Qinersinermi annertuumik kukkusoqarsimappat Qinersinermut Ataatsimiititaliaq pisinnaatitaavoq tunngavilersukkamik aalajangiinermigut qinersineq atorsinnaanngitsutut nalunaarutigissallugu qinersinermilu siulersuisut peqqussallugit nutaamik qinersisitseqqullugit.

## **12. Nutaamik qinersineq inaarutaasumillu nutaamik inissitsiterneq**

### **12.1. Nutaamik qinersineq**

Sapinngisamik piaartumik qinerseqqinneqassaaq. Qinersisussat allassimaffiata atorneqarsimasup annertuumik amigaateqarnera pissutigalugu qinersineq atortussaajunnaarsitaappat, qinersinerup atortussaajunnaarsitaanerata peqatigisaanik aalajangerneqarsinnaavoq qinersisussat allassimaffiat iluarsineqassasoq nutaamik qinerseqqinneqartinnagu inuit qinersinermi atortussaajunnaarsitaasumi qinersisussat allassimaffianni ilanngunneqarnissaminnut piumasarisaasunik eqqortitsisimangitsut piiarneqarnerisigut aammalu inuit allassimaffimmi ilanngunneqarsimasussaagaluartut ilanngunneqarnerisigut. Taamatut aalajangiisoqarpat qinersinermik siulersuisut qinersisussat allassimaffiata taamatut suliarineqarsimasup nalinginnaasumik misissorneqarnissaanut il.il. erseqqinnerusumik maleruaqqusalussapput.

### **12.2. Qinersinerup inaarutaasumik aalajangiivigineqarnera**

Qinersinermik siulersuisut ilaasortat nutaat qinigaanerat akuerisimappagu, aalajangiinerlu piffissaliussap naannginnerani Qinersinermut Ataatsimiititaliamut naammagittaalliuutigineqarsimangippat kommunalbestyrelsiusimasoq, nunaqarfimmi aqutsisuusimasut ilagiinnullu sinniisuusimasut aprilip 30-ani tunuassapput.

Aalajangiineq piffissaliussap iluani Qinersinermut Ataatsimiititaliamut naammagittaalliuutigineqarsimappat ataatsimiittartut ingerlaannassapput Qinersinermut Ataatsimiititaliaq aalajangerserlugu qinersisoqaqqissanngitsoq, imaluunniit inatsisit malillugit nutaamik qinersisoqareernissaata tungaanut.

Kommunalbestyrelsiusimasoq, nunaqarfimmi aqutsisuusimasut ilagiinnullu sinniisuusimasut tunuarniaripata nutaamik qinigaasut sulilissapput.

### **12.3. Qinigaasinnaassuseq pillugu Ataatsimiititamut nalunaaruteqarneq**

Qinersinerup kisinneqarnerata kingornatigut kingusinnerpaamillu qaammat ataaseq qaangiutsinnagu qinersinermik siulersuisut Qinigaasinnaassuseq pillugu Ataatsimiititamut nassiutissavaat qinigassanngortittut qinigaasimasut tamarmik aqqisa cpr.nr.-muisalu allattorsimaffiat.

Pinerluttulerinermik inatsisit tunngavigalugit pineqaatissinneqarsimanerit pillugit maleruaqqusat aamma atuupput aalajangersaasartutut ataatsimiititaliamut, siunnersuisoqatigiinnut il.il. ilaasortanut kommunit ataatsimiititaliaannut, soorlu najugaqarfigisami kommissioni akileraarusiisartumut, qinigaasinnaassuseqarneq naapertorlugu ilaasortaasinnaasoqaraangat. Kommunalbestyrelsip akisussaaffigaa ilaasortatut qinikkat aqqisa cpr.nr.-muisalu qinersinerup kingorna qaammatip ataatsip qaangiutinnginnerani Qinigaasinnaassuseq pillugu Ataatsimiititamut nassiunneqarsimanissaat.

Aamma taamatut pisoqassaaq ataatsimiittartunut pineqartunut sinniisusaaq aggersarneqaraangat, aamma pineqartoq piffissami killilimmiinnaq atuutissagaluarpat.

## **13. Naggasiullugit ataatsimut aalajangersakkat**

### **13.1. Saneqqutsinissamut tunngavissaatitaasut**

Qinersinermut ataatsimiititaliaq qinersinerup piareersarneqarnerani ingerlanneqarneranilu piginnaatitaavoq pissutsit naapertorlugit, tassunga ilanngullugu sila, pisariaqarsorinarneratut qinersinermi maleruaqqusanik saneqqutsinissaminut, patsisissaatillugu qinersinerup isertuussassaanerata qinersinerullu ingerlanneqarnerata nakkutigisaanerata tamatigut isumannaarsimanissaat. Qinersinermut Ataatsimiititaliaq qinersineq pillugu allatuiffimmini aalajangersakkat taakku malillugit saneqqutsinerit pisimasut nassuiaateqarfigissavai.

### **13.2. Qinersinerni aningaasartuutit**

Naqitertitanut, tamanut saqqummiussanut pappiaqqanullu taasivinnut aningaasartuutit aammalu sumiiffiit kommunit aggornerisa avataaniittut pillugit immikkut aningaasartuutit Landskarsimit akilerneqassapput. Qinersinermut atatillugu aningaasartuutit allat kommunip pineqartup akilissavai.

### **13.3. Qinersinerup isertuussaanera**

Qinersisartuq taasisimasoq suliasami sumiluunniit pisussaangilaq eqqartuussisunut oqaatigissallugu qinigassangortitaq kina imaluunniit partii sorleq taasimanerlugu.

### **13.4. Pineqaatissiinerit**

Kinaluunniit qinersisarneq pillugu inatsit malillugu imminut suliakkiutigineqartunik sumiginnaasoq pinerluttulerinermik inatsit malillugu pineqaatissinneqarnissamik eqqartuunneqarsinnaavoq.

Bilag:

Hjemmestyrets bekendtgørelse nr. 1 af 24. januar 2005 om valg til kommunalbestyrelser, bygdebestyrelser og menighedsrepræsentationer